

## ԱՍՏՎԱԾԱԲԱՆԱԿԱՆ ԵՐԿԽՈՍՈՒԹՅՈՒՆ ՀՌՈՄՈՒՄ

(հունվար 29 - փետրվար 3)

Սույն թվականի հունվարի 29-ին Վատիկանում իր աշխատանքներն է վերսկսել Հռոմի Կաթոլիկ Եկեղեցու և Հին Արևելյան Ուղղափառ Եկեղեցիների աստվածաբանական երկխոսության միջազգային համատեղ հանձնախմբի պաշտոնական չորրորդ ժողովը, որի նախորդ հանդիպումը տեղի էր ունեցել Մայր Աթոռ Սուրբ Էջմիածնում: Ժողովի ընթացքում հիմնականում քննարկվում են Եկեղեցու առաքելությանը վերաբերող խնդիրներ:

Հայ Եկեղեցին Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի օրհնությամբ ներկայացնում են Կենտրոնական Եվրոպայի Հայրապետական Պատվիրակ Գերաշնորհ Ս. Մեսրոպ արքեպիսկոպոս Գրիգորյանը և ԱՄՆ հայոց Արևելյան թեմի առաջնորդ Գերաշնորհ Ս. Խաժակ արքեպիսկոպոս Պարսամյանը: Մեծի Տանն Կիլիկիո Կաթողիկոսությունը ներկայացնում էին Գերաշնորհ Ս. Օշական արքեպիսկոպոս Չոլոյանը և Գերաշնորհ Ս. Նարեկ եպիսկոպոս Ալեմեզյանը:

Ժողովն սկսեց հունվարի 29-ին: Առաջին երկու օրերի նիստերին մասնակցում էին միայն Արևելյան Ուղղափառ Եկեղեցիները, հընթացս որի քննարկվեցին երկխոսության նախապատրաստական աշխատանքները:

Հունվարի 30-ին, ժողովից հետո, Գերաշնորհ Ս. Մեսրոպ և Ս. Խաժակ Սրբազանները, Իտալիո հայոց հոգևոր Հովիվ Ս. Առեն վարդապետ Շահինյանը հանդիպեցին Իտալիայում ՀՀ արտակարգ և լիազոր դեսպան տիար Ռուբեն Շուգարյանին և հյուպատոս Գևորգ Պետրոսյանին: Սրբազան Հայրերը, գնահատելով ՀՀ դեսպանի՝ հայ և իտալացի ժողովուրդների բարեկամական հարաբերությունների ամրապնդմանն ուղղված գործունեությունը, նրան փոխանցեցին Գարեգին Բ Վեհափառ Հայրապետի օրհնություններն ու բարեմաղթանքները:

Հունվարի 31-ին երկխոսությունն սկսվեց Արևելյան Ուղղափառ և Կաթոլիկ Եկեղեցիների միջև՝ կարդինալ Վալտեր Կասպերի և Բիշոյ մետրոպոլիտի առենապետությամբ: Ժողովին ելույթ ունեցավ Գերաշնորհ Ս. Խաժակ արքեպիսկոպոս Պարսամյանը՝ Առաքելություն, վկայություն, ծառայություն և մարդորության խնդիրները թեմայով:

Նույն օրը, երեկոյան, Սրբազան Հայրերը հանդիպեցին նաև Հռոմում ուսանող Մայր Աթոռ Սուրբ Էջմիածնի միաբաններ Ս. Գեղարդ արեղա Վահունու, Ս. Մուշեղ արեղա Բաբայանի և Ս. Ռուբեն արեղա Զարգարյանի հետ և Հոգեշնորհ Հայր Սուրբերին փոխանցեցին Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի օրհնությունն ու բարեմաղթանքները:

*ԴԻՎԱՆ ԻՏԱԼԻՈ ՀԱՅՈՑ ՀՈՎՎՈՒԹՅԱՆ*